



**REGIONE AUTÒNOMA DE SARDIGNA
REGIONE AUTONOMA DELLA SARDEGNA**



COMUNE DI SINNAI

COMUNU DE SÌNNIA

Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.

Sinniesus festajolus

De cras at a incumentzai sa festa de Sant'Alleni chi ocannu at a lompi a sa de centu editzionis.

Custa festa po sa Santa est fortzis sa prus chi at aguantau una manera antiga de afestai e est po custu fintzas una de is prus sentias festas de Sìnnia.

Sa crèsia si agatat in mesu a su sartu, innoi sa genti lompi po sa festa siat religiosa chi tzivili, aici comentis in antighidadi candu sa genti arribat a carretoni e biviati a ingiru de sa crèsia, in is glorieddas. Sa stàtua est antiga meda, probàbili meda de su 700, fata arribai de Napoli, oi est pintada cun coloris allutus, ma prima capassu chi fessit pintada in "estofado de oro".

Sant'Alleni partit de sa crèsia parrochiali de Santa Bràbara aintru de su còciu suu, acumpangiada de is sonus de is launeddas e lompi passendi po bingias, oliàrius e ortus, a sa crèsia cosa sua innui at a abarrai po totu su tempus de sa festa.

Comentis de oi e totu sa festa arruit sèmpiri su 18 de Austu, ma pagu tempus a oi sa festa est stètia fata s'ùrtimu dominigu de Austu.

Sa cresiedda chi conosceus oi est stètia fabricada in 1922 e acabada in su 1923, poita sa primu cresiedda fiat stètia sciorrocada.

Sa festa ocannu at a incumentzai cras su 17 de Austu a s'acabu de sa missa in Santa Bràbara e de innoi at a partiri sa prucezioni po sa cresiedda de Sant'Alleni.

A su noti at a incumentzai fintzas sa festa tzivilu cun is cantadoris Lello Atzeri, Francesco Capuzzi, Marco Damu e Bruno Melis chi ant a fai sa gara poètica a versus acumpangiaus de sa gitarra de Luca Tiddia.

Su 18 de Austu nci at a essi sa missa solenni po sa Santa e dònna annu in s'interis de sa missa, a s'Elevazioni aici comentis si fiat in antighidadi, benint sonadas is launeddas e benit sparada sa carrera de is fogus de artifizius.

Sa festa at a s'ighiri po totu s'acabu de sa cida e lunis su 21 de Austu cun sa torrada de sa Santa in sa crèsia de Santa Bràbara.

"Augusta difensora
de sa fidi de Gesus
assisti is devotus tuus
Sant'Alleni imperadora"